

ZAPISNIK

Prva redovna sjednica Skupštine Udruženja Original u 2021.godini

Predsjednik Skupštine Udruženja „ORIGINAL“ za ostvarivanje i zaštitu reproduksijskih prava, Budislav Vojinović sazvalo je prvu sjednicu Skupštine za 2021.godinu na dan 30.6.2021.godine u Sarajevu, s početkom u 14:00 sati.

Skupština je održana u Hotelu Holiday, Zmaja od Bosne 4, Sarajevo.

Predsjednik konstatuje da ima kvorum te da se sjednica Skupštine može održati.

Za zapisničara je imenovana Lejla Alić, članica Udruženja Original.

Predsjednik Skupštine pozdravlja prisutne prisutne i zahvaljuje se na dolasku.

Predsjednik Skupštine i otvara prvu tačku Dnevnog reda.

Ad 1. Skupština je jednoglasno usvojila sljedeći **Dnevni red**:

1. Usvajanje dnevnog reda, imenovanje zapisničara i ovjerivača
2. Odluka o usvajanju Zapisnika o izvršenom nadzoru nad radom Udruženja za 2019.godinu (Institut za intelektualno vlasništvo)
3. Predstavljanje Godišnjeg izvještaja Udruženja Original za 2020.godinu i odluka o usvajanju
4. Odluka o usvajanju troškova rada Udruženja Original za 2020.godinu
5. Odluka o usvajanju revizorskih izvještaja za 2020.godinu
6. Odluka o usvajanju Izvještaja o raspodjeli 2018/2019
7. Odluka o načinu isplate rezervisanih sredstava za raspodjelu 2018/2019
8. Odluka o usvajanju novog Pravilnika o raspodjeli
9. Odluka o usvajanju Finansijskog plana za 2021.godinu
10. Odluka o načinu i dinamici vraćanju pozajmica
11. Odluke o izmjenama Poslovnika o radu Skupštine
12. Odluka o prijemu u članstvo novih članova po pristiglim Pristupnicama
13. Ostala pitanja.

Dnevni red je jednoglasno usvojen.

Ad.2 Odluka o usvajanju Zapisnika o izvršenom nadzoru nad radom Udruženja za 2019.godinu (Institut za intelektualno vlasništvo): U skladu sa odredbama Zakona o kolektivnom ostvarivanju autorskog i srodnih prava BiH, Institut za intelektualno vlasništvo je nadležan da izvrši godišnji nadzor nad radom organizacije za kolektivno ostvarivanje prava za prethodnu godinu. Nadzor nad radom Originala predstavnici Instituta su obavili 16.9.2020.godine u kancelariju Udruženja Original, prilikom čega su konstatovali da je poslovanje Udruženja Original usklađeno sa Zakonom o kolektivnom ostvarivanju autorskog i srodnih prava. U Mišljenju, Institut navodi i da je finansijsko poslovanje u potpunosti prikazano fer i istinito po svim bitnim pitanjima i da je usklađeno sa svim bitnim zakonskim materijalno značajnim aspektima. Konstatovano je i da je Udruženje Original postupilo po svim preporukama Instituta za intelektualno vlasništvo izdatim tokom prethodnog nadzora.

Institut je skrenuo pažnju na korekcije načina knjiženja prihoda, odnosno da se knjiženje prihoda vrši na konto „prihod od vlastite aktivnosti“ te da troškovi poslovanja kolektivne organizacije trebaju biti do 30% od ukupno naplaćenih sredstava osim ukoliko Skupština svojom odlukom odobri povećanje prihoda.

Predsjednik Skupštine izvještava da je Upravni odbor donio odluku o načinu knjiženja koja se primjenjuje od 2020.godine, a iznosi troškova rada Udruženja su nominovani za usvajanje na Skupštini pod tačkom Dnevnog reda 4. Zapisnik o izvršenom nadzoru je dostavljen članovima u materijalima za skupštinu.

Skupština je jednoglasno usvojila Zapisnik Instituta za intelektualno vlasništvo o izvršenom nadzoru nad radom Udruženja za 2019.godinu.

Ad.3. Predstavljanje Godišnjeg izvještaja Udruženja Original za 2020.godinu i odluka o usvajanju. Predsjednik Skupštine poziva predsjednike Upravnog i nadzornog odbora da predstavne izvještaje rada ovih organa.

Damir Uzunović, predsjednik UO navodi da je u 2020.godini Upravni odbor je održavao redovne mjesečne sjednice, od čega deset sjednica je održano online (Skype i Zoom) i dvije sjednice u Sarajevu. Upravni odbor je donio 43 odluke iz oblasti svoje nadležnosti. U 2020.godini Upravni odbor se, pored tekućih redovnih poslova Udruženja, bavio pitanjima izmjena tarife te je tim povodom održano niz sastanaka sa predstavnicima korisnika. Udruženje je uputilo prijedlog izmjena tarife Institutu za intelektualno vlasništvo u 2020.godini.

Ivica Rorić, predsjednik NO izvještava da je Nadzorni odbor je imao dvije sjednice u toku 2020.godine. Ovaj organ je aktivno pratio rad Udruženja. Nadzor nad radom Udruženja je izvršen u januaru 2020.godine. Ovom prilikom je ustanovljeno da su djelovanje Udruženja kroz Skupštinu, Upravni odbor i Stručnu službu u potpunosti u skladu sa Statutom i zakonskom regulativom. Nadzor nad radom Udruženja za 2020.godinu je prolongiran do usvajanja potrebnih dokumenata (izvještaji i revizija).

Predsjednik Skupštine se zahvaljuje se i navodi da zbog opravdanog izostanka direktorice Stručne službe, izvještaj o radu Stručne službe i poslovanje Udruženja će pročitati Predsjednik Skupštine a prema izvještaju kloji je pripremila direktorica Stručne službe:

U toku 2020.godine Stručna služba je obavljala poslove iz Statutom propisane nadležnosti koji obuhvataju: vođenje administrativnih poslova, zastupanje Udruženja pred sudskim i drugim organima, vođenje međunarodne korespodencije, priprema ugovora o recipročnom zastupanju sa inostranim kolektivnim organizacijama, izrada i arhiviranje pristupnica, te ažuriranje evidencije članstva, komunikacija sa korisnicima i izrada ugovora kojim se kolektivno prenose druga prava za repertoar članova Udruženja, naplata autorske naknade prema tarifi Udruženja (odluci Vijeća ministara), davanje stručnih mišljenja članovima Udruženja.

U 2020 godini su za Udruženje radili

- Računovodstvene i knjigovodstvene poslove za Udruženje Original obavlja Društvo sa ograničenom odgovornošću BUSINESS LINE d.o.o. Sarajevo.
- Firma AB Soft d.o.o. vrši poslove održavanje fiskalne kase.
- U toku 2020.godine su angažovani saradnici za različite privremene i povremene dodatne poslove iz redovnog poslovanja Udruženja Original. Angažmani su realizirani kroz ugovore o djelu ili ugovore o autorskom djelu i odnose se na:
 - asistenti za unos podataka u bazu i njeno testiranje (Merima Tucak i Neđad Čengić)
 - konsultant za razvoj baze podataka i softvera za raspodjelu (Alan Rebić)
 - Poslove zastupanja pred sudovima za Udruženje Original obavlja Advokatsko društvo „Biser&Co“ d.o.o. iz Sarajeva.

U 2020.godini Udruženje je primilo u članstvo jednog nosioca prava (autora). Ukupni broj članova (pojedinačnih) iznosi: 61.

U pogledu ugovora sa korisnicima, Udruženje je u 2020.godini imalo važeće ugovore:

- 33 ugovora o reproduciranju u štampanom obliku pisanih djela autora i izdavača za privatnu ili drugu vlastitu upotrebu djela (Fotokopirnice)
- 7 ugovora o regulisanju prava na naknadu za privatnu ili drugu vlastitu upotrebu pisanih djela autora i izdavača u štampanom obliku od uvoza uređaja za fotokopiranje (uvoznici)

U 2020. godini Udruženje je pokrenulo parnične postupke pred nadležnim sudovima, te podnijelo zahtjeve za inspekcijski nadzor kod nadležnih tržišnih inspekcija.

Dvije tužbe su bile aktivne u toku 2020.godine:

- pokrenut postupak protiv PRINTEX d.o.o. Sarajevo, od dana 11.03.2019.godine
- ComTrade distribution d.o.o. iz 2018.godine, podnesena dana 4.12.2018.godine.

Prema standardima IFRRO-a, potpisani su novi ugovori, njih 4, o međusobnom zastupanju – razmjeni repertoara, u 2020.godini. Ugovori su potpisani sa organizacijama iz Turske, Rusije, Ukrajine i Litvanije.

Udruženje Original ostvaruje prihode obračunavajući autorsku naknadu uvoznicima novih uređaja za fotokopiranje i pravnim licima koja vrše usluge fotokopiranja, na osnovu dostavljenih izvještaja. Na prihode u 2020.godini je izrazito štetno uticala pandemija uzrokovana virusom Covid-19, zbog čega su mnogi korisnici imali smanjen rad što se u konačnici odrazilo i na prihode Udruženja. Važno je istaknuti da je zabilježen pad naknada od uvoza, te da su fotokopirnice bile direktno pogođene sigurnosnim mjerama (zatvaranje). Ovo je nepovoljno uticalo na pozitivan trend iz 2019.godine, pri čemu se u 2020.godini bilježi 55% manje fakturisanog iznosa.

Planirani prihodi u 2020.godini (nakon korekcija) su iznosili 165.000,00 KM. Međutim, ostvareni (fakturisani) prihodi su 92.701,16 KM. U 2020.godini je naplaćeno je 83.627,77 KM, a fakturisana naknada bez PDV-a je bila 79.231,76 KM.

Struktura prihoda je sljedeća:

- Naplaćeni prihod od naknade koja se plaća pri prvoj prodaji ili uvozu novih uređaja za fotokopiranje: 74.334 KM
- Naplaćeni prihod od naknade od izrađenih fotokopija namijenjenih za prodaju: 7.038 KM

Ukupni troškovi poslovanja u 2020. godini iznose 60.952,00 KM. Odobravanje troškova će biti predmet naredne tačke dnevnog reda.

Skupština je jednoglasno usvojila Godišnji izvještaj za 2020.godinu a Predsjednik naložio da se isti objavi na zvaničnoj web stranici Udruženja.

Ad.4. Odluka o usvajanju troškova rada Udruženja Original za 2020.godinu

U skladu sa preporukom Instituta za intelektualno vlasništvo iz izvršenog nadzora, troškovi rada Udruženja se usvajaju zasebno. Troškovi u 2020.godini su bili u okviru planiranih (realizovano je predviđenih pojedinačnih 89% troškova). Međutim, zbog niskih prihoda koji su direktna posljedica pandemije, postotak troška je veći od 30%.

Ukupni troškovi u 2020. godini iznose 60.952,00 KM i njihova specifikacija je dostavljena članstvu.

Ukupno % troškova u odnosu na prihode: 72,88%

Ukupno amortizacija trošak:1.365,66 KM

Povrat pozajmica trošak: glavnica = 10.000,00 KM+ kamate=2.385,62 KM

Ukupno fakturirani iznos poreza na dodanu vrijednost u 2020. godini je 13.469,61 KM.

Skupština je jednoglasno usvojila troškove rada udruženja i odobrila njihov procenat preko 30%.

Ad.5. Revizorski izvještaji za 2020. godinu su urađeni u skladu sa odredbama Zakona o kolektivnom ostvarivanju autorskog i srodnih prava. Original je obavezan uraditi reviziju poslovanja za svaku godinu. Revizija poslovanja i revizija podudarnosti su završene i sa zadovoljstvom Vas mogu obavijestiti da je nalaz revizora o radu Udruženja Original za 2020. godinu pozitivan. Rađene su dvije vrste revizije: revizija finansijskih izvještaja i revizija podudarnosti. Obje revizije su dostavljene članovima u materijalu za skupštinu. Pri izboru ovlaštene revizorske kuće su prikupljene tri ponude, od kojih je odabrana (UO i NO) finansijski najpovoljnija ponuda koja je iznosila 4.680.00 KM. Reviziju je obavilo Društvo za ekonomske usluge i promet „Radius“ d.o.o. Sarajevo.

U skladu sa članom 19. Statuta, stavljaju se na usvajanje revizija finansijskog poslovanja i revizija podudarnosti uz napomenu da Skupština zasebno glasa za svaku pojedinu reviziju

Skupština je jednoglasno usvojila reviziju finansijskog poslovanja.

Skupština je jednoglasno usvojila reviziju podudarnosti.

Predsjednik nalože da se obje revizije objave na zvaničnoj web stranici Udruženja.

Ad.6. Odluka o usvajanju Izvještaja o raspodjeli 2018/2019

U 2019. godini je usvojen Godišnji plan raspodjele prikupljenih naknada za 2018. i 2019. godinu. Godišnjim planom se utvrđuje plan raspodjele ubranih naknada za godine 2018. i 2019. Ukupno naplaćena autorska naknada, nakon odbitaka troškova rada Udruženja i vraćanja dijela pozajmica, kao i svih potrebnih fiskalnih odbijanja u skladu sa važećim zakonima, raspodjeljuje se nosiocima prava. Ukupni iznos predviđen za prvu raspodjelu iznosi 50.000,00 KM (pedesethiljada konvertibilnih maraka). Naknadnom odlukom Upravnog odbora (u skladu sa Odlukom o usvajanju Godišnjeg plana raspodjele) uvećan za iznos od 10.000 KM, što čini ukupni iznos za raspodjelu za navedeni period 60.000 KM.

Raspodjela je finalizirana u augustu 2020. godine, a isplata je otpočela također u augustu.

Svi iznosi koji su ispod utvrđenog minimalnog iznosa za raspodjelu ostaju vezani za ime nosioca prava i biće pridruženi iznosima koje u narednim raspodjelama pripadnu tom nosiocu prava. Svi ovako rezervisani iznosi se nalaze na kontu 101060. Raspoređena a neisplaćena sredstva koja su rezervisana po ovom osnovu iznose ukupno: 37.822,18 KM.

Iznosi za isplatu za autore su iznosili 27.000 KM ukupno i za izdavače 27.000 KM ukupno.

Predsjednik Skupštine podsjeća da je detaljni izvještaj dostavljen u materijalima za Skupštinu, a odluka o načinu isplate ostatka neisplaćenih sredstava je predmet sedme tačke dnevnog reda.

Skupština je jednoglasno usvojila Izvještaj o raspodjeli 2018/2019 a Predsjednik naložio da se isti objavi na zvaničnoj web stranici Udruženja.

Ad.7. Odluka o načinu isplate rezervisanih sredstava za raspodjelu 2018/2019

Imajući u vidu da je u prvoj raspodjeli bio obuhvaćen izuzetno veliki broj nosilaca prava koji nisu dostavili podatke potrebne za isplatu, kao i da je veliki iznos novca – posebno kod autora – ostao zarobljen pod velikim brojem malih iznosa (što se vidi iz Izvještaja o raspodjeli) predlaže se usvajanje rješenja za isplatu.

Predlaže se da novčana sredstva iz iznosa za raspodjele 2018-2019 koja su rezervisana za nosioce prava koji nisu dostavili potrebne podatke po ranijim pozivima, bit će isplaćena u 2021. godini na sljedeći način:

1. Udruženje će objaviti javni poziv za dostavu podataka od strane nosioca prava koji dostavu podataka ranije nisu izvršili,
2. Javni poziv će biti otvoren 60 dana u 2021. godini,
3. Javni poziv će biti objavljen u tri dnevna lista, na zvaničnoj web stranici i Facebook stranici Udruženja, te će biti distribuiran u udruženja nosilaca prava,
4. Udruženje će utvrditi koji nosioci prava su po pozivu iz 2021. godine (naknadno) dostavili potrebne podatke za isplatu te izvršiti isplatu u njihovu korist,
5. Udruženje će utvrditi preostali iznos sredstava koji bi pripao nosiocima prava koji nisu dostavili potrebne podatke ni po Pozivu Udruženja iz 2020. godine, u periodu do dana objave Javnog poziva, ni po Javnom pozivu u 2021. godine,
6. Iznosu sredstava koji bi pripao nosiocima prava koji nisu dostavili potrebne podatke (u skladu sa tačkom 5.), bit će pridružena sredstva za strana društva uzevši u obzir da su Upravni i Nadzorni odbor Udruženja saglasno potvrdili da prema važećim bilateralnim ugovorima nema obaveza prema stranim društvima,
7. Iznosi rezervacije za žalbe ostaje rezervisan u skladu sa važećim Godišnjim planom raspodjele (5 % u obje kategorije nosilaca prava) do 31.12.2022. godine za eventualno potrebno postupanje po prigovorima ili žalbama,
8. Iznos sredstava koji bi pripao nosiocima prava koji nisu dostavili podatke bit će preraspoređen na nosioce prava čiji podaci su dostupni i time će biti izvršena konačna raspodjela za 2018-2019. godine u 2021. godini po istim principima koji su primijenjeni za raspodjelu u 2020. godini.

Skupština je jednoglasno usvojila principe za isplatu rezervisanih sredstava za raspodjelu 2018/2019 te se nalaže UO i Stručnoj službi da provedu postupak raspodjele u skladu sa ovom odlukom.

Ad.8. Odluka o usvajanju novog Pravilnika o raspodjeli

Upravni odbor Udruženja Original je na osnovu iskustava iz prve raspodjele predložio izmjene Pravilnika o raspodjeli koje se odnose na završetak primjene principa solidarne i proporcionalne raspodjele (bili su svakako predviđeni kao jednokratni u prvoj raspodjeli); promjena godina koje se obračunavaju (objektivna dostupnost uključuje 2 godine u skladu se odredbama člana 46. st. 4. tč. a) Zakona o autorskom i srodnim pravima); uvođenje koeficijenta za djela i izdavače; pomjeranje datuma godišnje raspodjele u drugu polovicu godine; uvođenje aproksimativnog iznosa tiraža. Zbog broja izmjena, predlaže se usvajanje novog Pravilnika o raspodjeli te stavljanje prethodnog van snage (umjesto usvajanja izmjena). Prijedlog Pravilnika o raspodjeli je dostavljen članovima u materijalima za Skupštinu te se konstatuje da nije bilo prijedloga za izmjene i/ili dopune istog do dana održavanja sjednice.

Predsjednik Nadzornog odbora Ivica Rorić se javlja za riječ i ističe da nije saglasan sa predloženim koeficijentima sadržanim u članu 23. Prijedloga Pravilnika te da smatra da se u tom dijelu Pravilnik treba izmijeniti na način da svi udžbenici kao i drugi književni oblici, humor, satira, parodija nose isti koeficijent kao i izabrana djela.

Damir Uzunović se javlja za riječ i daje pojašnjenje koeficijenata koji su predloženi u Pravilniku, ističući da je namjera propisivanja koeficijenata upravo izjednačavanje pozicija svih autora i izdavača pisanih djela u raspodjeli, imajući u vidu da zbog karaktera npr. udžbenika kao obavezne literature isti, bez predviđenih koeficijenata, dominiraju u raspodjeli te autori ostalih vrsta pisanih djela uopće ne mogu ući u raspodjelu.

Za riječ se javlja i Advokat Admira Sitnić sa ciljem dodatnog pojašnjenja načina izrade i razloga izrade novog Pravilnika o raspodjeli, referirajući se na stav Instituta za intelektualno vlasništvo o potrebi raspodjele zadržanih sredstava na ime nosilaca prava koji ne dostavljaju uredno podatke za isplatu. Također, pojašnjava da su

koeficijenti usaglašeni sa praksama drugih država te da je najviše pažnje posvećeno upravo koeficijentima, a kako bi svi autori i izdavači imali barem približno jednak status u raspodjeli.

Nakon uključivanja u raspravu većeg broja članova skupštine, predložena je kraća pauza sa ciljem pokušaja usaglašavanja stavova u vezi sa predmetnim Pravilnikom, imajući u vidu da su svi članovi Skupštine blagovremeno zaprimili materijal za sjednicu Skupštine, ali da do održavanja iste niko nije dao bilo kakve prijedloge ili primjedbe.

Imajući u vidu da se nakon kraće pauze nije došlo do sporazuma u vezi sa članom 23. Pravilnika, a da se radi o izuzetno bitnom pitanju za sve autore i izdavače, predloženo je:

- Zakazivanje vanredne sjednice skupštine sa ciljem donošenja odluke samo po pitanju usvajanja Pravilnika o raspodjeli,
- Objavljivanje poziva članovima Skupštine na web stranici Udruženja Original za dostavu u roku od 8 dana u pisanoj formi svih eventualnih prijedloga za izmjene/dopune Pravilnika o raspodjeli u dijelu koji se odnosi na član 23..

Ad.9. Odluka o usvajanju Finansijskog plana za 2021.godinu

Udruženje Original je trebalo usvojiti Finansijski plan za 2021.godinu na sjednici Skupštine u decembru 2020, no kako se sjednica nije održala zbog pandemije, Upravni odbor je dostavio prijedlog Finansijskog plana za 2021 godinu za prvu redovnu Skupštinu. Finansijski plan Udruženja Original za 2021. godinu sačinjen je na bazi ostvarenih prihoda i troškova u 2020. godini, kao i na osnovu plana aktivnosti Udruženja za 2020. i 2021. godinu.

Naplata autorskih naknada u 2020.g. je ostvarena tokom cijele godine ali u značajno smanjenom iznosu u odnosu na prethodnu godinu. Pred nadležnim sudovima je pokrenuto i aktivno ukupno 2 parnična postupka i ukoliko budu riješeni u korist Udruženja tokom 2021.godine, može se očekivati velike iznose od naplate naknade (za protekle periode i tekući period).

Pandemija i mjere, koje su zbog nje donešene ostavila je šire ekonomske posljedice i izazvala poremećaje u poslovanju mnogih privrednih subjekata u BiH, uključujući korisnike u oblasti rada Udruženja. Došlo je do značajnog pada potražnje za određenim proizvodima i uslugama i do povećanja ekonomske nesigurnosti i neizvjesnosti. Sve je to imalo uticaja i na naplatu autorske naknade od uvoznika i fotokopirnica u periodu od marta do novembra 2020.g. pa je zabilježen značajan pad u odnosu na prethodnu godinu, obzirom da su zbog limitacija usljed pandemije, mnoge fotokopirnice potpuno prestale sa radom a uvoznici su usljed otežanog protoka roba i smanjenja potražnje za neesencijalnim proizvodima smanjili i količinu uvezenih uređaja.

Bez obzira na redovnu naplatu autorskih naknada, ipak i dalje nije drastično povećan priliv sredstava i postupci pred nadležnim institucijama traju dugo, a zbog neizvjesne situacije sa pandemijom Covid-19, Udruženje će prihode od naknade koja se plaća pri uvozu ili prvoj prodaji uređaja za fotokopiranje planirati u blagom porastu u odnosu na prošlogodišnji plan, dok će prihode od naknade od izrađenih fotokopija planirati u istom iznosu obzirom na trend zatvaranja fotokopirnica, kako slijedi u tabeli:

	PRIHODI	IZNOS /KM/
1	Prihod od naknade koja se plaća pri prvoj prodaji ili uvozu novih uređaja za fotokopiranje	180.000,00
2	Prihod od naknade od izrađenih fotokopija namijenjenih za prodaju, koju plaćaju fizička i pravna lica koja uz naplatu obavljaju usluge fotokopiranja	15.000,00

PRIHODI	IZNOS /KM/
UKUPNO	195.000,00

Na osnovu analize troškova nastalih u dvanaest mjeseci 2020. godine (100% planiranih troškova), kao i na osnovu planova rada i aktivnosti za 2021. godinu, planirani troškovi u 2021. godini iznose 69.235,97 KM i čine 35,51% planiranog prihoda

Prijedlog Finansijskog plana za 2021.godinu je dostavljen svim članovima u materijalima za Skupštinu.

Skupština je jednoglasno usvojila Finansijski plan za 2021.godinu a Predsjednik naložio da se isti objavi na zvaničnoj web stranici Udruženja.

Ad.10. Odluka o načinu i dinamici vraćanju pozajmica

Prošlogodišnjim finansijskim planom je bilo predviđeno da Udruženje vrati dio pozajmica kojima su finansirani troškovi poslovanja od osnivanja i početka djelovanja osnivačima a da to ne ugrozi poslovanje Udruženja i planirane isplate nosiocima prava. Tako je u 2020. godini izvršen povrat pozajmica u iznosu od 10.000,00 KM osnivačima Buybook (5000 KM) i Ivica Rorić (5000 KM). Izvršeni su obračuni kamata prema važećim ugovorima o pozajmici, te isplaćeni zajedno sa isplatom glavnice pozajmice.

U decembru 2020.godine su dospjele pozajmice koje su odobrene Udruženju na početku rada kada nije imalo vlastita sredstva a kako bi se omogućilo da stekne uslove za dobijanje licence i neometan rad u prvim godinama poslovanja.

Predsjednik Skupštine poziva Damira Uzunovića, predsjednika UO da predstavi ovu tačku dnevnog reda.

Damir Uzunović izvještava da je Udruženje zaprimilo zahtjeve za isplatu pozajmica od Nove dječije knjige i Buybook-a, o čemu je odluku donio Upravni odbor. UO je međutim odlučio da o dinamici isplata kamata po isplaćenim pozajmicama i isplati ostatka pozajmica odluku donese Skupština jer bi isplata ugrozila redovno poslovanje Udruženja.

U prvih šest mjeseci 2021.godine izvršen je povrat sljedećih pozajmica:

- 04.01.2021.g.-NOVA DJEČIJA KNJIGA d.o.o.-50.000,00 KM-glavnica,(obračunata kamata na ovaj iznos vraćene glavnice je u iznosu 21.775,80 KM i prijedlog je da bude isplaćivana sukcesivno u skladu sa finansijskim mogućnostima)
- 05.04.2021.g.-BUYBOOK d.o.o.-10.000,00 KM-glavnica, (obračunata kamata na ovaj iznos vraćene glavnice je u iznosu 1.889,88 KM i bit će isplaćena kada se za to steknu finansijski uslovi).

Preostali iznos pozajmica/ glavnica je 3.500,00 KM (BUYBOOK d.o.o.), i 5.000,00 KM (IVICA RORIĆ), što je ukupno 8.500,00 KM. Kamata na ove pozajmice će biti obračunata na dan isplate glavnice.

Uzunović izvještava da prema realizaciji ostvarenih prihoda odnosno stanja na računu i nakon odbitka rashoda za prvih šest mjeseci 2021.godine ostatak sredstava na računu je nedovoljan za povrat pozajmica, plaćanje kamata i isplatu tantijema jer bi time bilo ugroženo izmirenje općih/fiksni troškova Udruženja. Predlaže da Udruženje nastavi izmiriti sve obaveze koje nastanu kao rezultat planiranih aktivnosti, a povrat pozajmica da se uradi dinamikom koju dozvole finansijske prilike, a potvrdi Upravni odbor.

Skupština je jednoglasno usvojila isplatu pozajmica u skladu sa finansijskim mogućnostima Udruženja sa ciljem sprečavanja ugrožavanja rada Udruženja.

Ad.11. Odluke o izmjenama Poslovnika o radu Skupštine

Zbog otežane mogućnosti održavanja redovnih Skupština koje su se desile zbog pandemije COVID 19 2020. i 2021.godine, predlaže se uvrštavanje dodatne mogućnosti predstavljanja po zastupniku samo u vanrednim okolnostima. Poslovnik se mijenja i u dijelu koji je rezultat naknadnih izmjena u radu Udruženja (formalne korekcije). Naglašava da je prijedlog izmjena ranije dostavljen članstvu.

Skupština je jednoglasno usvojila izmjene Poslovnika o radu Skupštine a Predsjednik naložio da se isti objavi na zvaničnoj web stranici Udruženja.

Ad.12. Odluka o prijemu u članstvo novih članova po pristiglim Pristupnicama.

Prema odredbama Statuta, redovnim članom može postati isključivi nositelj prava na naknadu za privatnu i drugu vlastitu upotrebu djela, bez obzira da li je fizičko ili pravno lice, a koji je povjerio Udruženju ostvarivanje svojih prava zaključivanjem ugovora – pristupnice. Odluku o prijemu u članstvo donosi Skupština Udruženja u skladu sa odredbama Statuta i Pravilnika o radu Skupštine. Udruženje ne može odbiti zahtjev za članstvo iz oblasti svoje djelatnosti (kolektivno ostvarivanje prava na naknadu za privatnu i drugu vlastitu upotrebu pisanih djela), osim ako je nosilac prava već sklopio ugovor za kolektivno ostvarivanje svojih prava u BiH iz oblasti djelatnosti Udruženja sa stranom kolektivnom organizacijom.

U periodu između dvije skupštine pristigle su 2 pristupnice za koje se konstatuje da su uredno popunjene. Pristupnice su dostavili: Nardin Mašić, Sarajevo, autor i Vedad Smailagić, Sarajevo, autor

Skupština je jednoglasno odlučila o prijemu u članstvo Nardina Mašića i Vedada Smailagića.

Ad.13. Ostala pitanja, Predsjednik Skupštine poziva prisutne da delegiraju druga pitanja ili prijedloge. Dodatnih pitanja ili tema nije bilo.

Nakon što su se iscrpile sve tačke Dnevnog reda, Predsjednik Skupštine zaključuje sjednicu.


Sjednica Skupštine Udruženja Original je završena u 15:30h.

Zapisničarka



Lejla Alić

Ovjerivač zapisnika



Budislav Vojinović, predsjednik Skupštine Udruženja

Sarajevo, 30.6.2021.

Broj: RS/01/21